



白氏文集卷第十八

律詩

五言七言自兩韻至三十韻九一百首

夜入瞿塘峽



瞿塘天下險夜上信難哉
岿似雙屏合天如匹帛開
逆風驚浪起拔棹闇船來
欲識愁多少高於灩澦堆

初到忠州贈李六

好在天涯李使君江頭相見日
黃昏吏人生硬都如
鹿市井蕭疎只抵村一隻蘭船
當驛路百層石磴上
州門更無平地堪行處
虛受朱輪五馬恩

親到方知此詩之妙

郡齋暇日憶廬山草堂兼寄二林僧社三十

韻皆叙貶官以來出處之意

諫諍知無補遷移分所當
不堪匡聖主只合事空王

龍象投新社鷓鷯失故行沈吟辭北闕誘引向西方
便住雙林寺仍開一草堂平治行道路安置坐禪牀
手板支爲枕頭巾閣在牆先生烏几舄居士白衣裳
竟歲何曾悶終身不擬忙滅除殘夢想換盡舊心腸
世界多煩惱形神久損傷正從風鼓浪轉作日銷霜
佛經云此生死無休已如風鼓海吾道尋知止君恩
浪又云煩惱如霜露慧日能消除偶未忘忽蒙頒鳳詔兼謝剖魚章蓮靜方依水葵枯
重仰陽三車猶夕會五馬已晨裝去似尋前世來如
別故鄉眉低出鷲嶺脚重下地岡廬山岡名漸望廬山遠
彌愁峽路長香爐峰隱隱巴字水茫茫瓢挂留庭對
經收在屋梁春拋紅藥圃夏憶白蓮塘唯擬捐塵事
將何荅寵光有期追永遠晉時永遠二法師曾居此寺無政繼龔

黃南國秋猶熱西齋夜暫涼間吟四句偈靜對一爐
香身老同立井心空是道場覓僧爲去伴留俸作歸
糧爲報山中侶憑看竹下房會應歸去在松菊莫教
荒

贈康叟

八十秦翁老不歸南賓太守乞寒衣再三憐汝非他
意天寶遺民見漸稀

鸚鵡

竟日語還默中宵棲復驚身囚緣彩翠心苦爲分明
暮起歸巢思春多憶侶聲誰能拆籠破從放快飛鳴
京使回累得南省諸公書因以長句詩寄謝
蕭五劉二元八吳十一韋大陸郎中崔二

十二牛二李七庾三十一李六李十楊三
樊大楊十二頁外

雪壓泥埋未死身每勞存問媿交親浮萍漂泊三千
里列宿參差十五人禁月落時君待漏畬烟深處我
行春瘴鄉得老猶爲幸豈敢傷嗟白髮新

東城春意

風輒雲不動郡城東北隅晚來春澹澹天氣似京都
絃管隨宜有杯觴不道無其如親故遠無可共歡娛
木蓮對生巴峽山谷間巴民亦呼爲黃心對
大者高五丈涉冬不凋身如青楊有白文
葉如桂厚大無脊花如蓮香色艷膩皆同
獨房蕊有異四月初始開自開追謝僅二

十日忠州西北十里有鳴玉谿生者穠茂
猶異元和十四年夏命道士母丘元志寫
惜其遐僻因題三絕句云

如折芙蓉栽旱地似拋芍藥挂高枝雲埋水隔無人
識唯有南賓太守知

二

紅似臙脂膩如粉傷心好物不須臾山中風起無時
節明日重來得在無

三

已愁花落荒巖底復恨根生亂石間幾度欲移移不
得天教拋擲在深山

種桃杏

無論海角與天涯大抵心安即是家路遠誰能念鄉
曲年深兼欲忘京華忠州且作三年計種杏栽桃擬
待花

新秋

二毛生鏡日一葉落庭時老去爭由我愁來欲
誰空銷閒歲月不見舊親知唯弄扶牀女時時強展眉

龍昌寺荷池

冷碧新秋水殘紅半破蓮從來寥落意不似此池邊

聽竹枝贈李侍御

巴童巫女竹枝歌懊惱何人怨咽多
暫聽遣君猶悵望長聞教我復如何

寄胡餅與楊州

胡麻餅樣學京都麪脆油香新出爐
寄與饑饒楊大使嘗看得似輔興無

感櫻桃花因招飲客

櫻桃昨夜開如雪髮髮今年白似霜
漸覺花前成老醜何曾酒後更顛狂
誰能聞此來相勸共泥春風醉一場

東亭閒望

東亭盡日坐誰伴寂寥身綠桂爲佳客
紅蕉當美人笑言雖不接情狀似相親
不作悠悠想如何度晚春

畫木蓮花圖寄元郎中

花房膩侶紅蓮朵艷色鮮如紫牡丹
唯有詩人應解愛丹青寫出與君看

和李灋州題韋開州經藏詩

既悟蓮花藏須遺貝葉書菩提無處所文字本空虛
觀指非知月忘筌是得魚聞君登彼岸捨筏復何如

九日題塗谿

蕃草席鋪楓葉斫竹枝歌送菊花杯明年尚作南賓
守或可重陽更一來

即事寄微之

畚田澁米不耕鉏旱地荒園少菜蔬想土風今若
此料看生計合何如衣縫紕類黃絲縮飯下腥鹹白
小魚飽暖饑寒何足道此身長短是空虛

題郡中荔枝詩十八韻兼寄萬州楊八使君

奇果標南土芳林對北堂素華春漠漠丹實夏煌煌

葉捧低垂戶枝擎重壓牆始因風弄色漸與日爭光
夕訝條懸火朝驚對點粧深於紅躑躅大校白檳榔
星綴連心朶珠排耀眼光紫羅裁襯殼白玉裹填瓢
早歲曾聞說今朝始摘嘗嚼疑天上味嗅異世間香
潤勝蓮生水鮮逾橘得霜臙脂掌中顆甘露舌頭漿
物少猶珍重天高苦渺茫已教生暑月又使阻遐方
粹液靈難駐妍姿嫩易傷近南光景熱向北道途長
不得充王賦無由寄帝鄉唯君堪擲贈面白侶潘郎

留北客

峽外相逢遠樽前一會難即須分手別且強展眉歡
楚袖蕭條舞巴絃趣數彈笙歌隨分有莫作帝鄉看
重寄荔枝與楊使君時聞楊使君欲種植故

有落句戲之

摘來正帶凌晨露寄去須憑下水船映我緋衫渾不見對公銀印最相鮮香連翠葉真堪畫紅透青籠實可憐聞道萬州方欲種愁君得喫是何年

和萬州楊使君四絕句

競渡

競渡相傳爲汨羅不能止過意無他自經放逐來憔悴能校靈均死幾多

江邊草

聞君澤畔傷春草憶在天門街裡時漠漠淒淒愁滿眼就中惆悵是江蘼

喜慶李

東都綠李萬州栽君手封題我手開把得欲嘗先悵望與渠同別故鄉來

白槿花

秋蕓晚英無豔色何因栽種在人家使君只別羅敷面爭解回頭愛白花

望郡南山寄行簡

臨江一嶂白雲間紅綠層層錦繡斑不作巴南天外意何如昭應望驪山

和行簡望郡南山

反照前山雲對明從君苦道侶華清試聽腸斷巴猿叫早晚驪山有此聲

種荔枝

紅顆珍珠誠可愛白鬚太守亦何癡十年結子知誰
在自向庭前種荔枝

陰雨

嵐霧今朝重江山此地深灘聲秋更急峽氣曉多陰
望闕雲遮眼思鄉雨滴心將何慰幽獨賴此北窗琴

送客歸京

水陸四千里何時歸到秦舟辭三峽雨馬入九衢塵
有酒留行客無書寄貴人唯憑遠傳語好在曲江春

送蕭處士遊黔南

能文好飲老蕭郎身侶浮雲鬢侶霜生計拋來詩是
業家園忘却酒為鄉江從巴峽初成字猿過巫陽始
斷腸不醉黔中爭去得磨圍山月正蒼蒼

東樓醉

天涯深峽無人地歲暮窮陰欲夜天不向東樓時一
醉如何擬過二三年

寄微之

時微之為
虢州司馬

高天默默物茫茫各有來由致損傷鸚為能言長剪
翅龜緣難死久搯牀莫嫌冷落拋閒地猶勝炎蒸臥
瘴鄉外物竟關身底事謾排門戟繫腰章

東樓招客夜飲

莫辭數數醉東樓除醉無因破得愁唯有綠樽紅燭
下暫時不侶在忠州

醉後戲題

自知清冷侶冬凌每被人呼作律僧今夜醉醺羅綺

煖被君融盡玉壺冰

冬至夜

老去襟懷常濩落病來鬚髮轉蒼浪心灰不及爐中
火鬢雪多於砌下霜三峽南賓城最遠一年冬至夜
偏長今宵始覺房櫳冷坐索寒衣託孟光

竹枝詞四首

瞿塘峽口水烟低白帝城頭月向西唱到竹枝聲咽
處寒猿聞鳥一時啼

二

竹枝苦怨怨何人夜靜山空歇又聞蠻兒巴女齊聲
唱愁殺江南病使君

三

巴東船舫上巴西波面風生雨脚齊水蓼冷花紅簇
簇江籬濕葉碧淒淒

四

江畔誰人唱竹枝前聲斷咽後聲遲怪來調苦緣詞
苦多是通州司馬詩

酬嚴中丞晚眺黔江見寄

江水三迴曲愁人兩地情磨圍山下色明月峽中聲
晚後連天碧秋來徹底清臨流有新恨照見白鬚生

寄題楊萬州四望樓

江上新樓名四望東西南北水茫茫無由得與君攜
手同凭欄干一望鄉

荅楊使君登樓見憶

忠萬樓中南北望南州烟水北州雲兩州何事偏相
憶各是籠禽作使君

除夜

歲暮紛多思天涯渺未歸老添新甲子病減舊容輝
鄉國仍留念功名已息機明朝四十九應轉悟前非

聞雷

瘴地風霜早溫天氣候催窮冬不見雪正月已聞雷
震蟄蟲虵出驚枯草木開空餘客方寸依舊侶寒灰

春至

若爲南國春還至爭向東樓日又長白片落梅浮澗
水黃梢新柳出城牆閒拈蕉葉題詩詠悶取藤枝引
酒嘗樂事漸無身漸老從今始擬負風光

感春

巫峽中心郡巴城四面春草青臨水地頭白見花人
憂喜皆心火榮枯是眼塵除非一杯酒何物更關身

春江

炎涼昏曉苦推遷不覺忠州已二年閉閣只聽朝暮
鼓上樓空望往來船鶯聲誘引來花下草色勾留坐
水邊唯有春江看未厭縈砂遶石綠潺湲

題東樓前李使君所種櫻桃花

身入青雲無見日手栽紅樹又逢春唯留花向樓前
看故故拋愁與後人

巴水

城下巴江水春來侶麴塵軟砂如渭曲斜岍憶天津

影蘸新黃柳香浮小白蘋臨流搔首坐惆悵爲何人

野行

草潤杉襟重沙乾履齒輕仰頭聽鳥立信脚望花行
暇日無公事衰年有道情浮生短於夢夢裡莫營營

送高侍御使廻因寄楊八

明月峽邊逢制使黃茆岬上是忠州到城莫說忠州
惡無益虛教揚八愁

奉酬李相公見示絕句

時初聞國哀

碧油幢下捧新詩榮賤雖殊共一悲涕淚滿襟君莫
怪甘泉侍從最多時

喜山石榴花開

去年自廬山移來

忠州州裡今日花廬山山頭去年對已憐根損斬新

栽還喜花開依舊數赤玉何人少琴軫紅纈誰家合

羅袿但知爛熳恣情開莫怕南賓桃李妬

戲贈蕭處士清禪師

三杯菟菘忘機客百納頭陀任運僧又有放慵巴郡
守不營一事共騰騰

錢虢州以三堂絕句見寄因以本韻和之

同事空王歲月深相思遠寄定中吟遙知清淨中和
化祇用金剛三昧心

予早歲與錢君同習讀金剛三昧經故去

三月三日

暮春風景初三日流世光陰半百年欲作閒遊無好
伴半江惆悵却回船

寒食夜

四十九年身老日一百五夜月明天抱膝思量何事
在癡男駮女喚鞦韆

代州民間

龍昌寺底開山路巴子臺前種柳林官職家鄉都忘
却誰人會得使君心

荅州民

宦情抖擻隨塵去鄉思磨銷逐日無唯擬騰騰作閒
事遞渠不道使君愚

荔枝樓對酒

荔枝新熟雞冠色燒酒初開琥珀香欲摘一枝傾一
盞西樓無客共誰嘗

房家夜宴喜雪戲贈主人

風頭向夜利如刀賴此溫爐軟錦袍桑落氣熏珠翠
煖柘枝聲引管絃高酒鈎送盞推蓮子燭淚粘盤壘
蒲萄不醉遣儂爭散得門前雪片似鵝毛

醉後贈人

香毬趁拍迴環匝花盞拋巡取次飛自入春來不同
醉那能夜去獨先歸

初除尚書郎脫刺史緋

親賓相賀問何如服色恩光盡反初頭白喜拋黃草
峽眼明驚拆紫泥書便留朱紱還鈴閣却著青袍侍
玉除無柰嬌癡三歲女繞腰啼哭覓銀魚

留題開元寺上方

東寺臺閣好上方風景清數來猶未厭長別豈無情

蘇水多臨坐辭花剩繞行最憐新岍柳手種未全成
別種東坡花對兩絕

三年留滯在江城草對禽魚盡有情何處殷勤重回
首東坡桃李種新成

二

花林好住莫顛顛春至但知依舊春樓上明年新太
守不妨還是愛花人

別橋上竹

穿橋迸竹不依行恐礙行人被損傷我去自慙遺愛
少不教君得侶甘棠

發白狗峽次黃牛峽登高寺却望忠州

白狗次黃牛灘如竹節稠路穿天地險人續古今

忽見千花塔因停一葉舟畏途常迫促靜境暫淹留
巴曲春全盡巫陽雨半收北歸雖引領南望亦回頭
昔去悲殊俗今來念舊遊別僧山北寺拋竹水西樓
郡對花如雪軍廚酒似油時時大開口自笑憶忠州
棣華驛見楊八題夢兄弟詩

遙聞旅宿夢兄弟應爲郵亭名棣華名作棣華來早
晚自題詩後屬楊家

商山路有感

萬里路長在六年身始歸所經多舊館太半主人非

商山路驛桐對昔與微之前後題名處

與君前後多遷謫五度經過此路隅笑問中庭老桐
對這回歸去免來無

惻惻吟

惻惻復惻惻逐臣返鄉國前事難重論少年不再得
泥塗絳老頭斑白炎瘴靈均面黎黑六年不死却歸
來道著姓名人不識

德宗皇帝挽歌四首

執象宗玄祖貽謀啓孝孫文高栢梁殿禮薄灞陵原
宮仗辭天闕朝儀出國門生成不可報二十七年春

二

虞帝南巡後殷宗諒闇中初辭鑄鼎地已閉望仙宮
曉落當陵月秋生滿旆風前星承帝座不使北辰空

三

業大承宗祖功成付子孫睿文詩播樂遺訓史標言

節表中和德方垂廣利恩懸知千載後理代數貞元

四

夢減三齡壽哀延七月期寢園愁望遠宮仗哭行遲
雲日添寒慘笳簫向晚悲因山有遺詔如葬漢文時

昭德王皇后挽歌詞

仙去逍遙境詩留窈窕章春歸金屋少夜入壽宮長
鳳引曾辭輦蠶休昔採桑陰靈何處感沙麓月無光

太平樂詞二首

已下七首在翰
林時奉勅撰進

歲豐仍節儉時泰更銷兵聖念長如此何憂不太平

二

湛露浮堯酒薰風起舜歌願同堯舜意所樂在人和

小曲新詞二首

霽色鮮宮殿秋聲脆管絃聖明千歲樂歲歲似今年

一

紅裙明月夜碧簾早秋時好向昭陽宿天涼玉漏遲

閨怨詞三首

朝憎鶯百轉夜妬燕雙棲不慣經春別唯知到曉啼

二

珠箔籠寒月紗牕背曉燈夜來巾上淚一半是春冰

三

關山征戍遠閨閣別離難苦戰應顛顛寒衣不要寬

殘春曲 禁中口號

禁苑殘鶯三四聲景遲風慢暮春情日西無事墻陰

下閒踏宮花獨自行

長安春

青門柳枝軟無力東風吹作黃金色街東酒薄醉易

醒滿眼春愁消不得

長樂坡送人賦得愁字

行人南北分征路流水東西接御溝終日坡前恨離

別謾名長樂是長愁

獨眠吟二首

夜長無睡起階前寥落星河欲曙天十五年來明月

夜何曾一夜不孤眠

二

獨眠客夜夜可憐長寂寂就中今夜最愁人涼月清

風滿牀席

期不至

紅燭青樽久延佇出門入門天欲曙星稀月落竟不
來烟柳隴隴鵲飛去

長洲苑

春入長洲草又生鷓鴣飛起少人行年深不辨娃宮
處夜夜蘇臺空月明

憶江柳

曾栽楊柳江南岼一別江南兩度春遙憶青青江岼
上不知攀折是何人

南浦別

南浦淒淒別西風嫋嫋秋一看腸一斷好去莫回頭
三年別

悠悠一別已三年相望相思明月天腸斷青天望明
月別來三十六回圓

傷春詞

深淺簷花千萬枝碧紗牕外轉黃鸝殘粧含淚下簾
坐盡日傷春春不知

後宮詞

淚濕羅巾夢不成夜深前殿按歌聲紅顏未老恩先
斷斜倚熏籠坐到明

白氏文集卷第十八

白氏文集卷第十九

律詩

五言七言自兩韻至

四十韻凡一百首

白氏文集卷第十九

律詩

五言七言自兩韻至四十韻凡一百首

吟元郎中白鬚詩兼飲雪水茶因題壁上

吟詠霜毛句閒嘗雪水茶城中展眉處只是有元家

吳七郎中山人待制班中偶贈絕句

金馬東門隻日開漢庭待詔重仙才第三松樹非華

表那得遼東鶴下來

和張十八秘書謝裴相公寄馬

齒齊臙足毛頭膩秘閣張郎叱撥駒洗了領花翻假

錦走時蹄汗踏真珠青衫昨見曾驚否紅粟難賒得

飽無丞相寄來應有意遣君騎去上雲衢

峇山侶

額下髭鬚半是絲光陰向後幾多時非無解挂簪纓
意未有支持伏臆資冒熱衝寒徒自取隨行逐隊欲
何爲更慙山侶頻傳語五十歸來道未遲

早朝思退居

霜嚴月苦欲明天忽憶閒居思浩然自問寒燈夜半
起何如暖被日高眠唯慙老病披朝服莫慮肌寒計
俸錢隨有隨無且歸去擬求豐足是何年

曲江亭晚望

曲江岸北凭欄干水面陰生日脚殘塵路行多綠袍
故風亭立久白鬚寒詩成闍著閒心記山好遙偷病
眼看不被馬前提省印何人信道是郎官

初除主客郎中知制誥與王十一李七元九

三舍人中書同宿話舊感懷

閒宵靜語喜還悲聚散窮通不自知已分雲泥行異
路忽驚鷄鶴宿同枝紫垣曹署榮華地白髮郎官老
醜時莫怪不如君氣味此中來校十年遲

西省對花憶忠州東坡新花樹因寄題東樓

每看闕下丹青樹不忘天邊錦繡林西掖垣中今日
眼南賓樓上去年心花含春意無分別物感人情有
淺深最憶東坡紅爛熳野桃山杏水林檎

寄題忠州小樓桃花

再遊巫峽知何日揔是秦人說向誰長憶小樓風月
夜紅欄干外兩三枝

中書連直寒食不歸因憶元九

去歲清明日南巴古郡樓今年寒食夜西省鳳池頭
併上新人直難隨舊伴遊誠知視草貴未免對花愁
髮髮莖莖白光陰寸寸流經春不同宿何異在忠州
春憶二林寺舊遊因寄郎滿晦三上人

一別東林三度春每春常似憶親情頭陀會裡爲逋
客供奉班中作老臣清淨久辭香火伴塵勞難索幻
泡身寂慙僧社題橋處十八人名空一人

和元少尹新授官

官穩身應泰春風信馬行縱忙無苦事雖病有心情
厚祿兒孫飽前驅道路榮花時八十直無暇賀元兄
朝迴和元少尹絕句
朝客朝回回望好盡紆朱紫佩金銀此時獨與君爲

伴馬上青袍唯兩人

重和元少尹

鳳閣舍人京亞尹白頭俱未著緋衫南宮起請無消
息朝散何時得入街

中書夜直夢忠州

閣下燈前夢巴南城裏遊覓花來渡口尋寺下山頭
江色分明綠猿聲依舊愁禁鐘驚睡覺唯不上東樓
醉後

酒後高歌且放狂門前閒事莫思量猶嫌小戶長先
醒不得多時住醉鄉

待漏入閣書事奉贈元九學士閣老

衙排宣政仗門啓紫宸關彩筆停書命花輓趨立班

稀星點銀礫殘月墮金環閣漏猶傳水明河漸下山
從東分地色向北仰天顏碧縷爐烟直紅垂珮尾間
綸闈慙並入翰苑忝先攀笑我青袍故饒君茜綬殷
詩仙歸洞裡酒病滯人間好去鴛鸞侶冲天便不還

晚春重到集賢院

官曹清切非人境風日鮮明是洞天滿砌荆花鋪紫
毯隔墻榆莢撒青錢前時謫去三千里此地辭來十
四年虛薄至今慙舊職院名擡舉號爲賢

紫薇花

絲綸閣下文書靜鐘鼓樓中刻漏長獨坐黃昏誰是
伴紫薇花對紫薇郎

後宮詞

雨露由來一點恩爭能遍布及千門三千宮女臙脂
面幾箇春來無淚痕

卜居

遊宦京都二十春貧中無處可安貧長羨蝸牛猶有
舍不如碩鼠解藏身且求容立錐頭地免似漂流木
偶人但道吾廬心便足敢辭湫隘與囂塵

題新居寄元八

青龍岡北近西邊移入新居便泰然冷巷閉門無客
到煖簷移榻向陽眠階墀寬窄繞容足墻壁高低粗
及肩莫羨昇平元八宅自思買用幾多錢

登龍尾道南望憶廬山舊隱

龍尾道邊來一望香爐峯下去無因青山舉眼三千

里白髮平頭五十人自笑形骸紆組綬將何言語掌
絲綸君恩壯健猶難報况被年年老逼身

馮閣老處見與嚴郎中酬和詩因戲贈絕句
乍來天上宜清淨不用回頭望故山縱有舊遊君莫
憶塵心起即墮人間

見于給事暇日上直寄南省諸郎官詩因以

戲贈

倚作天仙弄地仙誇張一日抵千年黃麻勅勝長生
籙白紵詞嫌內景篇雲彩誤居青瑣地風流合在紫
微天東曹漸去西垣近鶴駕無妨更著鞭

題新昌所居

宅小人煩惱泥深馬鈍頑街東閒處住日午熱時還

院窄難栽竹墻高不見山唯應方寸內此地覺寬閒

西省北院新構小亭種竹開窓東過騎省與

李常侍隔窓小飲各題四韻

結託白鬚伴因依青竹叢題詩新壁上過酒小窓中
深院晚無日虛簷涼有風金貂醉看好回面紫垣東

酬元郎中同制加朝散大夫書懷見贈

命服雖同黃紙上官班不共紫垣前青衫脫早差三
日白髮生遲校九年曩者定交非勢利老來同病是
詩篇終身擬作卧雲伴逐月須收燒藥錢五品足爲
婚嫁主緋袍著了好歸田

初著緋戲贈元九

晚遇緣才拙先衰被病牽那知垂白日始是著緋年

身外名徒爾人間事偶然我朱君紫綬猶未得差肩
和韓侍郎苦雨

潤氣凝柱礎繁聲注瓦溝閭留窓不曉涼引簾先秋
葉濕蠶應病泥稀燕亦愁仍聞放朝夜誤出到街頭
連雨

風雨暗蕭蕭鷄鳴暮復朝碎聲籠苦竹冷翠落芭蕉
水鳥投簷宿泥蛙入戶跳仍聞蕃客見明日欲追潮
初加朝散大夫又轉上柱國

紫薇今日煙霄地赤嶺前年泥土身得水魚還動鱗
鬣乘軒鶴亦長精神且慙身忝官階貴未敢家嫌活
計貧柱國勲成私自問有何功德及生人

行簡初授拾遺同早朝入閣因示十二韻

夜色尚蒼蒼槐陰夾路長聽鐘出長樂傳鼓到新昌
宿雨沙隄潤秋風棹燭香馬驕欺地軟人健翁天涼
待漏排閭闔停珂擁建章爾隨黃閣老吾次紫薇郎
並入連稱籍齊趨對折方鬪班花接萼綽立鴈分行
近職誠爲美微才豈合當綸言難下筆諫紙易盈箱
老去何時來不料量唯求殺身地相誓答恩光

秋日登樂遊園

獨行獨曲江頭回馬遲遲上樂遊蕭颯涼風與衰
鬢誰教同會一時秋

秋早起有懷元少尹

秋來轉覺此身衰晨起臨階盥漱時漆匣鏡明頭盡
白銅甌水冷蔭先知光陰縱惜留難住官職雖多得

已遲老去相逢無別計強開笑口展愁眉

夜箏

紫袖紅絃明月中自彈自感闌低容絃凝指咽聲臺
處別有深情一萬重

妻初授邑號告身

弘晨舊縣授新封鈿軸金泥誥一通我轉官階常自
君加邑號有何功花牋印了排窠濕錦襍裝來耀
手紅倚得身名便慵墮日高猶睡綠窓中

送客南遷

我說南中事君應不願聽曾經身困苦不覺語丁寧
燒處愁雲夢波時憶洞庭春畚烟勃勃秋瘴露冥冥
蚊蚋經冬活魚龍欲雨腥水蟲能射影山鬼解藏形

穴掉巴蛇尾林飄鳩鳥翎颶風千里黑蕪草四時青
客似驚弦鴈舟如委浪萍誰人勸言笑何計慰漂零
慎勿琴離膝長須酒滿瓶大都從此去宜醉不宜醒

暮歸

不覺百年半何曾一日閒朝隨燭影出暮趁鼓聲還
甕裡非無酒墻頭亦有山歸來常困卧早晚得開顏

寄遠

欲忘忘未得欲去去無由兩腋不生翅二毛空滿頭
坐看新落葉行上取高樓暝色無邊際茫茫盡眼愁

舊房

遠壁秋聲蟲絡絲入簷新影月低眉牀帷半故簾旌
斷仍是初寒欲夜時

錢侍郎使君以題廬山草堂詩見寄因酬之
殷勤江郡守悵望掖垣郎
慙見新瓊什思歸舊草堂
事隨心未得名與道相妨
若不休官去人間到老忙

寄山僧

時年五十年

眼看過半百早晚掃巖扉
白首誰留住青山自不歸
百千萬劫障四十九年非
會擬抽身去當風抖擻衣

慈恩寺有感

時初直初逝居敬方病

自問有何惆悵事寺門臨入却遲迴
李家哭泣元家病柿葉紅時獨自來

酬嚴十八郎中見示

口厭含香握厭蘭紫薇青瑣舉頭看
忽驚髮後蒼浪髮未得心中本分官
夜酌滿容花色暖秋吟切骨玉

聲寒承明長短君應入莫憶家江七里灘

寄王秘書

霜菊花萎日風梧葉碎時怪來秋思苦
綠詠秘書詩

中書寓直

繚繞官墻圍禁林半開閭闔曉沉沉
天晴更覺南山近月出方知西掖深
病對詞頭慙彩筆老看鏡面愧華簪
自嫌野物將何用土木形骸麋鹿心

自問

黑花滿眼絲滿頭早衰因病病因愁
宦途氣味已諳盡五十不休何日休

曲江獨行招張十八

曲江新歲後冰與水相和南岸猶殘雪
東風未有波

偶遊身獨自相憶意如何莫待春深去花時鞍馬多

新居早春二首

靜巷無來客深居不出門鋪沙蓋苔面掃雪擁松根
漸煖宜閒步初晴愛小園覓花都未有唯覺樹枝繁

二

地潤東風暖閒行踏草芽呼童遣移竹留客伴嘗茶
雷滴簷冰盡塵浮隙日斜新居未曾到隣里是誰家

新昌新居書事四十韻因寄元郎中張博士

冒寵已三遷歸朝始二年囊中貯餘俸園外買閒田
狐兔同三逕蒿萊共一壥新園聊刻穢舊屋且扶顛
簷漏移傾瓦梁欹換蠹椽平治達臺路整頓近階甃
巷狹開容駕墻低壘過肩門間堪駐蓋堂室可鋪筵

丹鳳樓當後青龍寺在前市街塵不到官樹影相連
省吏嫌坊遠豪家笑地偏敢勞賓客訪或望子孫傳
不覓他人愛唯將自性便等閒栽樹木隨分占風烟
逸致因心得幽期遇境壺松聲疑澗底草色勝河邊
虛潤冰銷地晴和日出天苔行滑如簾莎坐軟於縣
簾每當山卷帷多待月褰籬東花掩映窓北竹嬋娟
迹慕青門隱名慙紫禁仙假歸思晚沐朝去戀春眠
拙薄才無取踈慵職不專題墻書命筆沽酒率分錢
栢杵春靈藥銅瓶漱暖泉爐香穿蓋散籠燭隔紗燃
陳室何曾掃陶琴不要絃屏除俗事盡養活道情全
尚有妻孥累猶為組綬纏終須拋爵祿漸擬斷腥膻
大抵宗莊叟私心事竺乾浮榮水劃字真諦火生蓮

梵部經十二玄書字五千是非都付夢語默不妨禪
博士官猶冷郎中病已痊多同僻處住久結靜中緣
緩步携筇杖徐吟展蜀箋老宜閒語話悶憶好書篇
蠻榼來方瀉蒙茶到始煎無辭數相見鬢髮各蒼然
喜敏中及第偶示所懷

自知群從爲儒少豈料詞場中第頻桂折一枝先許
我楊穿三葉盡驚人始予進士及第行簡轉於文墨
須留意貴向烟霄早致身莫學爾兄年五十蹉跎始
得掌絲綸

久不見韓侍郎戲題四韻以寄之

近來韓閣老疎我我心知戶大嫌甜酒才高笑小詩
靜吟乘月夜閒醉曠花時還有愁同處春風滿鬢絲

寄白頭陀

近見頭陀伴云師老更慵性靈閒似鶴顏狀古於松
山裡猶難覓人間豈易逢仍聞移住處太白最高峯
和韓侍郎題楊舍人林池見寄

渠水閣流春凍解風吹日炙不成疑鳳池冷暖君諳
在二月因何更有冰

勤政樓西老柳

半朽臨風樹多情立馬人開元一株柳長慶二年春
偶題閣下廳

靜愛青苔院深宜白髮翁貌將松共瘦心與竹俱空
暖有低簷日春多颺幕風平生閒境界盡在五言中
予與故刑部李侍郎早結道友以藥術爲事

與故京兆元尹晚爲詩侶有林泉之期周
歲之間二君長逝李住曲江北元居昇平
西追感舊遊因貽同志

從哭李來傷道氣自亡元後減詩情金丹同學都無
益水竹隣居竟不成月夜若爲遊曲水花時那忍到
昇平如年七十身猶在但恐傷心無處行

送馬舍人閣老往襄陽

紫微閣送君回第二廳簾下不開莫戀漢南風景
好峴山花盡早歸來

莫走柳條詞送別

南陌傷心別東風滿把春莫欺楊柳弱勸酒勝於人
酬韓侍郎張博士雨後遊曲江見寄

小園新種紅櫻樹閒遶花枝便當遊何必更隨鞍馬
隊衝泥蹋雨曲江頭

元家花

今日元家宅櫻桃發幾枝稀稠與顏色一似去年時
失卻東園主春風可得知

代人贈王員外

好在王員外平主記得不共賒黃叟酒同上莫愁樓
靜接殷勤語狂隨爛熳遊那知今日眼相見冷於秋

惜小園花

曉來紅萼稠零盡但見空枝四五株前日狂風昨夜
雨殘芳更合得存無

蕭相公宅遇自遠禪師有感而贈

宦途堪笑不勝悲昨日榮華今日衰轉似秋蓬無定處長於春夢幾多時半頭白髮慙蕭相滿面紅塵問遠師應是世間緣未盡欲拋官去尚遲疑

草詞畢遇芍藥初開因詠小詩紅藥當階翻

詩以爲一句未盡其狀偶成十六韻

罷草紫泥詔起吟紅藥詩詞頭封送後花口拆開時坐對鉤簾久行觀步履遲兩三叢爛熳十二葉參差昔日房微歛當階朶旋歆釵葶抽碧股粉莖撲黃絲動蕩情無限低斜力不支周迴看未足比諭語難爲勾漏丹砂裏焦僥火焰旗彤雲賸根蒂絳幘欠纓綉况有晴風度仍兼宿露垂疑香熏晷盡似淚著胭脂有意留連我無言怨思誰應愁明日日落如恨隔年期

齒齒泥連萼玫瑰刺繞枝等量無勝者唯眼與心知

喜張十八博士除水部員外郎

老何歿後吟聲絕雖有郎官不愛詩無復篇章傳道路空留風月在曹司長嗟博士官猶屈亦恐騷人道漸衰今日聞君除水部喜於身得省郎時

與沈楊二舍人閣老同食勅賜櫻桃翫物感

恩因成十四韻

清曉趨丹禁紅櫻降紫宸驅禽養得熟和葉摘來新圓轉盤傾玉鮮明籠透銀內園題兩字西掖賜三臣
榮惑晶華赤醴醕氣味真如珠未穿孔似火不燒人
杏俗難爲對桃頑詎可倫肉嫌盧橘厚皮笑荔枝皴
瓊液酸甜足金丸大小勻偷湏防曼倩惜莫擲安仁

手擘纜離核匙抄半是津甘爲舌上露煖作腹中春
已懼長尸祿仍驚數食珍取慙恩未報飽餒不才身

送嚴大夫赴桂州

地壓坤方重官兼憲府雄桂林無瘴氣栢署有清風
山水衙門外旌旗樓艦中大夫應絕席詩酒與誰同

春夜宿直

三月十四夜西垣東北廊碧梧葉重疊紅藥樹低昂
月砌漏幽影風簾飄闇香禁中無宿客誰伴紫薇郎

夏夜宿直

人少庭宇曠夜涼風露清槐花滿院氣松子落堦聲
寂寞挑燈坐沉吟踏月行年衰自無趣不是厭承明

七言十二句贈駕部吳郎中七兄

時早夏朝歸閉齋獨

處偶題此什

四月天氣和且清綠槐陰合沙堤平獨騎善馬銜蹀
穩初著單衣肢體輕退朝下直少徒侶歸舍閉門無
送迎風生竹夜窓間臥月照松時臺上行春酒冷嘗
三數盞曉琴閒弄十餘聲幽懷靜境何人別唯南
宮老駕兄

玉真張觀主下小女冠阿容

綽約小天仙生來十六年姑山半峯雪瑤水一枝蓮
晚院花留立春窓月伴眠迴眸雖欲語阿母在傍邊

龍花寺主家小尼

郭代公愛姬薛氏幼嘗爲尼小名仙人子

頭青眉眼細十四女沙彌夜靜雙林怕春深一食飢
步慵行道困起晚誦經遲應似仙人子花宮未嫁時

訪陳二

曉垂朱綬帶晚著白綸巾
出去爲朝客歸來是野人
兩餐聊過日一榻足容身
此外皆閒事時時訪老陳

晚庭逐涼

送客出門後移床下砌初
趁涼行繞竹引睡臥看書
老更爲官拙慵多向事疎
松窓倚藤杖人道似僧居

曲江憶李十一

李君歿後共誰遊柳岸荷亭
兩度秋獨遶曲江行一
匝依前還立水邊愁

江亭翫春

江亭乘曉閱衆芳春妍景麗
草樹光日消石桂綠嵐
氣風墜木蘭紅露漿水蒲漸
展書帶葉山榴半含琴

軫房何物春風吹不變
愁人依舊髮蒼蒼

聞夜砧

誰家思婦秋擣帛月苦風
淒砧杵悲八月九月正長
夜千聲萬聲無了時應到
天明頭盡白一聲添得一
莖絲

板橋路

梁苑城西二十里一渠春水
柳千條若爲此路今重
過十五年前舊板橋曾共
玉顏橋上別不知消息到
今朝

青門柳

青青一樹傷心色曾入幾人
離恨中爲近都門多送
別長條折盡減春風

梨園弟子

白頭垂淚語梨園五十年前雨露恩莫問華清今日
事滿山紅葉鎖宮門

暮江吟

一道殘陽鋪水中半江瑟瑟半江紅可憐九月初三
夜露似真珠月似弓

思婦眉

春風搖蕩自東來折盡櫻桃綻盡梅唯餘思婦愁眉
結無限春風吹不開

怨詞

奪寵心那慣尋思倚殿門不知移舊愛何處作新恩
寒閨怨

寒月沈沈洞房靜真珠簾外梧桐影秋霜欲下手先
知燈底裁縫剪刀冷

秋房夜

雲露青天月漏光中庭立久却歸房水窓席冷未能
卧挑盡殘燈秋夜長

採蓮曲

菱葉縈波荷颭風荷花深處小船通逢郎欲語低頭
笑碧玉搔頭落水中

鄰女

娉婷十五勝天仙白日姮娥旱地蓮何處閒教鸚鵡
語碧紗窓下綉床前

閨婦

斜凭綉床愁不動紅綃帶緩綠鬟低遼陽春盡無消息夜合花前日又西

移牡丹哉

金錢買得牡丹哉何處辭叢別主來紅芳堪惜還堪恨百處移將百處開

聽夜箏有感

江州去日聽箏夜白髮新生不願聞如今况是頭成雪彈到天明亦任君

代謝好妓答崔員外

謝好妓也

青娥小謝娘白髮老崔郎謾愛胸前雪其如頭上霜別後曹家碑背上思量好字斷君腸

琵琶

絃清撥利語錚錚背卻殘燈就月明賴是心無惆悵事不然爭柰子絃聲

和殷協律琴思

秋水蓮冠春草裙依稀風調似文君煩君五指分明語知是琴心佯不聞

寄李蘇州兼示楊瓊

真娘墓頭春草碧心奴髮上秋霜白為問蘇臺酒席中使君歌笑與誰同就中猶有楊瓊在堪止東山伴

謝公

聽彈湘妃怨

玉軫朱絃瑟瑟徽吳娃徵調奏湘妃分明曲裡愁雲雨似道蕭蕭郎不歸

江南詞有云暮雨蕭蕭郎不歸

閒坐

煖擁紅爐火閒搔白髮頭百年慵裡過萬事醉中休
有室同摩詰無兒比鄧攸莫論身在日身後亦無憂
不睡

焰短寒缸盡聲長曉漏遲年衰自無睡不是守三尸

白氏文集卷第十九

白氏文集卷第二十

律詩

五言七言
凡一百首

初罷中書舍人

自慙拙宦叨清貴還有癡心怕素餐或望君臣相獻
替可圖妻子免飢寒性踈豈合承恩义命薄元知濟
事難分寸寵光酬未得不休更擬覓何官

宿陽城驛對月

自此後詩赴
杭州路中作

親故尋回駕妻孥未出關鳳皇池上月送我過商山

商山路有感

并序

前年夏予自忠州刺史除書歸闕時刑部李十一侍
郎戶部崔二十員外亦自澧果二郡守徵還相次入
闕皆同此路今年予自中書舍人授杭州刺史又由

此途出二君已逝予獨南行追歎興懷慨然成詠後
來有與予杓直虞平游者見此短什能無惻惻乎儻
未忘情請爲繼和長慶二年七月三十日題於內鄉
縣南亭云爾

憶昨徵還日三人歸路同此生都是夢前事旋成空
杓直泉埋玉虞平燭過風唯殘樂天在頭白向江東

重感

停驂歇路渴重感一長吁擾擾生還死紛紛榮又枯
困支青竹杖間將白髭鬚莫歎身衰老交游半已無
逢張十八負外籍

旅思正茫茫相逢此道傍曉嵐林葉闇秋露草花香
白髮江城守青衫水部郎客亭同宿處忽似夜歸鄉
赴杭州重宿棗華驛見楊八舊詩感題一絕
徃恨今愁應不殊題詩梁下又踟躕羨君猶夢見兄
弟我到天明睡亦無

寓言題僧

劫風火起燒荒宅苦海波生蕩破船力小無因救焚
溺清凉山下且安禪

內鄉縣村路作

日下風高野路涼緩驅疲馬闇思鄉渭村秋物應如
此棗赤梨紅稻穗黃

路上寄銀匙與阿龜

謫宦心都慣辭鄉去不難緣留龜子住涕淚一闌干
小子須嬌養鄒婆爲好看銀匙封寄汝憶我即加餐

山泉煎茶有懷

坐酌泠泠水看煎瑟瑟塵無由持一盞寄與愛茶人

郢州贈別王八使君

昔是詩狂客今爲酒病夫強吟翻悵望縱醉不歡娛
鬢髮三分白交親一半無郢城君莫厭猶校近京都

吉祥寺見錢侍郎題名

雲雨三年別風波萬里行愁來正蕭索况見古人名

重到江州感舊遊題郡樓十一韻

掌綸知是忝剖竹信爲榮才薄官仍重恩深責尚輕
昔徵從典午今出自承明鳳詔休揮翰漁歌欲濯纓
還乘小艘艤却到古淦城醉客臨江待禪僧出郭迎
青山滿眼在白髮半頭生又校三年老何曾一事成

重過蕭寺宿再上庾樓行雲水新秋思閭閻舊日情
郡民猶認得司馬詠詩聲

贈江州李十使君員外十四韻

我本江湖上悠悠任運身朝隨賣藥客暮伴釣魚人
迹爲燒丹隱家緣嗜酒貧經過剡溪雪尋覓武陵人
豈有踈狂性堪爲侍從臣仰頭驚鳳闕下口觸龍鱗
綉珮辭天上風波向海濱非賢虛偶聖無屈敢求伸
昔去曾同日今來卽後塵元和末與李員外同日黜官今又相次出爲刺史
中年俱白髮左宦各朱輪長短才雖異榮枯事略均
殷勤李員外不合不相親

題別遺愛草堂兼呈李十使君

李亦廬山人常隱白鹿洞

曾住爐峯下書堂對藥臺斬新蘿徑合依舊竹窓開

砌水親開決池荷手自栽五年方斲至一宿又須回
縱未長歸得猶勝不到來君家白鹿洞聞道亦生苔

重題

泉石尚依依林疎僧亦稀何年辭水閣今夜宿雲扉
謾獻長楊賦虛拋薜荔衣不能成一事贏得白頭歸

夜泊旅望

少睡多愁客中宵起望鄉沙明連浦月帆白滿船霜
近海江彌濶迎秋夜更長烟波三十宿猶未到錢塘

九江北岸遇風雨

黃梅縣邊黃梅雨白頭浪裏白頭翁九江濶處不見
岸五月盡時多惡風人間穩路應無限何事拋身在
此中

舟中晚起

日高猶掩水窓眠枕簟清凉八月天泊處或依沽酒
店宿時多伴釣魚船退身江海應無用憂國朝廷自
有賢且向錢塘湖上去冷吟閒醉二三年

秋寒

雪鬢年顏老霜庭景氣秋病看妻檢藥寒遣婢梳頭
身外名何有人間事且休澹然方寸內唯擬學虛舟

初到郡齋寄錢湖州李蘇州

聊取二郡一晒
故有落句之戲

俱來滄海郡半作白頭翁謾道風烟接何曾笑語同
吏稀秋稅畢客散晚亭空霽後當樓月潮來滿座風
雪溪殊冷僻茂苑太繁雄唯此錢塘郡閒忙恰得中

對酒自勉

五十江城守停杯一自思頭仍未盡白官亦不全卑
榮寵尋過分歡娛已校遲肺傷雖怕酒心健尚誇詩
夜舞吳娘袖春歌蠻子詞猶堪三五歲相伴醉花時
郡樓夜宴留客

北客勞相訪東樓爲一開卷簾待月出把火看潮來
艷聽竹枝曲香傳蓮子杯寒天殊未曉歸騎且遲迴
醉題侯仙亭

蹇步垂朱綬華纓映白鬚何因駐衰老只有且歡娛
酒興還應在詩情可使無登山與臨水猶未要人扶

東院

松下軒廊竹下房暖簷晴日滿繩床淨名居士經三
卷榮啓先生琴一張不去齒衰嫌橘醋病來肺渴覺

茶香有時閒酌無人伴獨自騰騰入醉鄉

虛白堂

虛白堂前衙退後更無一事到中心移床就月簷間
臥臥詠閒詩側枕琴

閒夜詠懷因招周協律劉薛二秀才

世名檢束爲朝士心性踈慵是野夫高置寒燈如客
店深藏夜火似僧爐香濃酒熟能嘗否冷澹詩成肯
和無若厭雅陰須俗飲妓筵勉力爲君鋪

晚興

極浦收殘雨高城駐落暉山明虹半出松閣鶴雙歸
將吏隨衙散文書入務稀閒吟倚新竹筠粉汗朱衣

衰病

老與病相仍華簪髮不勝行多朝散藥睡少夜停燈
祿食分供鶴朝衣減施僧性多移不得郡政謾如繩
病中對病鶴

困病病夫憐病鶴精神不損翅翎傷未堪再舉摩霄
漢只合相隨覓稻梁但作悲吟和嘹唳難將俗貌對
昂藏唯應一事宜爲伴我髮君毛俱似霜

夜歸

半醉閒行湖岸東馬鞭敲鐙響瓏璵萬株松樹青山
上十里沙堤明月中樓角漸移當路影潮頭欲過滿
江風歸來未放笙歌散盡戟門開蠟燭紅

臘後歲前遇景詠意

海梅半白柳微黃凍水初融日欲長度臘都無苦霜

霰迎春先有好風光郡中起晚聽衙鼓城上行慵倚
女墻公事漸閒身且健使君殊未厭餘杭

白髮

雪髮隨梳落霜毛繞鬢垂加添老氣味改變舊容儀
不肯長如漆無過揔作絲最憎明鏡裡黑白半頭時

錢湖州以箬下酒李蘇州以五醖酒相次寄
到無因同飲聊詠所懷

勞將箬下忘憂物寄與江城愛酒翁鐺脚三州何處
會甕頭一盞幾時同傾如竹葉盈樽綠飲作桃花上
面紅莫怪殷勤醉相憶曾陪西省與南宮

花樓望雪命宴賦詩

連天際海白皚皚好上高樓望一迴何處更能分道

路此時兼不認池臺萬重雲樹山頭翠百尺花樓江
畔開素壁聯題分韻句紅爐巡飲暖寒盃冰鋪湖水
銀爲面風卷汀沙玉作堆絆惹舞人春艷曳勾留醉
客夜徘徊偷將虛白堂前鶴失却樟亭驛後梅別有
故情偏憶得曾經窮苦照書來

晚歲

壯歲忽已去浮榮何足論身爲百口長官是一州尊
不覺白雙鬢徒言朱兩轡病難施郡政老未合君恩
歲暮別兄弟年衰無子孫惹愁闔世網治苦賴空門
擘帶知腰瘦看燈覺眼昏不緣衣食繫尋合返丘園

宿竹閣

晚坐松簷下宵眠竹閣間清虛當服藥幽獨抵歸山

巧未能勝拙忙應不及閒無勞別修道即此是玄關
歲暮枉衢州張使君書并詩因以長句報之
西州彼此意何如官職蹉跎歲欲除浮石潭邊停五
馬望濤樓上得雙魚萬言舊手才難敵五字新題思
有餘貧薄詩家無好物反投桃李報瓊琚

和薛秀才尋梅花同飲見贈

忽驚林下發寒梅便試花前飲冷盃白馬走迎詩客
去紅筵鋪待舞人來歌聲怨處微微落酒氣醺時旋
旋開若到歲寒無雨雪猶應醉得兩三迴

與諸客空腹飲

隔宿書招客平明飲暖寒麴神寅日合酒聖卯時歡
促膝纔飛白酡顏已渥丹碧籌攢米枕紅袖拂散盤

醉後歌尤異狂來舞可難拋盃語同坐莫作老人看
小歲日對酒唸錢湖州所寄詩

獨酌無多興閒吟有所思一盃新歲酒兩句故人詩
楊柳初黃日髭鬚半白時蹉跎春氣味彼此老心知
錢塘湖春行

孤山寺北賈亭西水面初平雲脚低幾處早鶯爭暖
樹誰家新燕啄春泥亂花漸欲迷人眼淺草纔能沒
馬蹄最愛湖東行不足綠楊陰裡白沙堤

題靈隱寺紅辛夷花戲酬光上人

紫粉筆含尖火焰紅臙脂染小蓮花芳情鄉思知多
少惱得山僧悔出家

重向火

火銷灰復死踈葉已經旬豈是人情薄其如天氣春
風寒忽再起手冷重相親却就紅爐坐心如逢故人

候仙亭同諸客醉作

謝安山下空携妓柳惲洲邊只賦詩爭及湖亭今日
會嘲花詠水贈蛾眉

城上

城上鼕鼕鼓朝衙復晚衙爲君慵不出落盡遶城花
早行林下

披衣未冠櫛晨起入前林宿露殘花氣朝光新葉陰
傍松人迹少隔竹鳥聲深閒倚小橋立傾頭時一唸
送李校書赴寒食歸義興山居

大見騰騰詩酒客不憂生計似君稀到舍將何作寒

食滿船唯載樹栽歸

題孤山寺山石榴花示諸僧衆

山榴花似結紅巾容艷新妍占斷春色相故關行道
地香塵擬觸坐禪人瞿曇弟子君知否恐是天魔女
化身

獨行

闇誦黃庭經在口閒携青竹杖隨身晚花新筍堪爲
伴獨入林行不要人

二月五日花下作

二月五日花如雪五十二人頭似霜聞有酒時須笑
樂不關身事莫思量羲和趁日沉西海鬼伯驅人葬
北邙只有且來花下醉從人笑道老顛狂

戲題木蘭花

紫房日照臙脂拆素艷風吹臙粉開怪得獨饒脂粉
態木蘭曾作女郎來

清明日觀妓舞聽客詩

看舞顏如玉聽詩韻似金綺羅從許笑絃管不妨吟
可惜春風老無嫌酒盞深辭花送寒食併在此時心

西湖晚歸回望孤山寺贈諸客

柳湖松島蓮花寺晚動歸橈出道場盧橘子低山雨
重棕櫚葉戰水風涼烟波澹蕩搖空碧樓殿參差倚
夕陽到岸請君回首望蓬萊宮在中央

湖中自照

重重照影看容鬢不見朱顏見白絲失却少年無覓

處泥他湖水欲何為

贈蘇鍊師

兩鬢蒼然心浩然松窓深處藥爐前
携將道士通宵語忘却花光盡日眠
明鏡懶開長在匣素琴欲弄半無絃
猶言莊子多詞句只讀逍遙六七篇

杭州春望

望海樓明照曙霞

城東樓名望海樓

護江堤白蹋晴沙濤聲

夜入伍員廟柳色春藏蘇小家紅袖
織綾誇柿蒂

杭州

出柿蒂花者尤佳也

青旗沽酒趁梨花

其俗釀酒趁梨花時熟號為梨花春誰開

湖寺西南路草綠裙腰一道斜

孤山寺路在湖州中草綠時望如裙腰

飲散夜歸贈諸客

鞍馬夜紛紛香街起暗塵
回鞭招飲妓分火送歸人

風月應堪惜杯觴莫厭頻
明朝三月盡忍不送殘春

湖亭晚歸

盡日湖亭臥心閒事亦稀
起因殘醉醒坐待晚涼歸
松雨飄藤帽江風透葛衣
柳堤行不厭沙軟絮霏霏

東樓南望八韻

不厭東南望江樓對海門
風濤生有信天水合無痕
鷗帶雲帆動鷗和雪浪翻
魚鹽聚為市烟火起成村
日脚金波碎峯頭鈿點繁
送秋千里鴈報暝一聲猿
已豁煩襟悶仍開病眼昏
郡中登眺處無勝此東軒

醉中酬殷協律

泗水城邊一分散浙江樓
上重遊陪揮鞭二十年前
別命駕三千里外來醉袖
放狂相向舞愁眉和笑一

時開留君夜住非無分且盡青娥紅燭臺
孤山寺遇雨
拂波雲色重洒葉雨聲繁水鷺雙飛起風荷一向翻
空濛連北岸蕭颯入東軒或擬湖中宿留船在寺門
樟亭雙櫻樹

湖上夜飲

郭外迎人月湖邊醒酒風誰留使君飲紅燭在舟中

贈沙鷗

老逼教垂白官科遣著緋形骸雖有累方寸却無機
遇酒多先醉逢山愛晚歸沙鷗不知我猶避集旗飛

餘杭形勝

餘杭形勝四方無州傍青山縣枕湖遠郭荷花三十
里拂城松樹一千株夢兒亭古傳名謝教妓樓新道
姓蘇州西靈隱山上有夢謝亭即是杜明浦夢謝靈
運之所因名客兒也蘇小小本錢塘妓人也
獨有使君年太老風光不稱白髭鬚

江樓夕望招客

海天東望夕茫茫山勢川形濶復長燈火萬家城四
畔星河一道水中央風吹古木晴天雨月照平沙夏
夜霜能就江樓銷暑否比君茅舍校清涼

新秋病起

一葉落梧桐年光半又空秋多上階日涼足入懷風
病瘦形如鶴愁焦髮似蓬損心詩思裡伐性酒狂中

華蓋何曾借金丹不致功猶須自慙愧得作白頭翁
木芙蓉花下招客飲

晚涼思飲兩三盃召得江頭酒客來莫怕秋無伴醉
物水蓮花盡木蓮開

悲歌

白頭新洗鏡新磨老逼身來不奈何耳裡頻聞故人
死眼前唯覺少年多塞鴻遇暖猶回翅江水因潮亦
反波獨有衰顏留不得醉來無計但悲歌

江樓晚眺景物鮮奇吟翫成篇寄水部張員

外

澹烟疎雨間斜陽江色鮮明海氣涼
層散雲收破樓閣虹殘水照斷橋梁
風翻白浪花千片鴈點青天宇

一行好著丹青圖寫取題詩寄與水曹郎

夜招周協律兼荅所贈

滿眼雖多客開眉復向誰少年非我伴秋夜與君期
落魄俱耽酒殷勤共愛詩相憐別有意彼此老無兒

重酬周判官

秋愛冷吟春愛醉詩家眷屬酒家仙若教早被浮名
繫可得閒遊三十年

飲後夜醒

黃昏飲散歸來臥夜半人扶強起行枕上酒容和睡
醒樓前海月伴潮生將歸梁燕還重宿欲滅窓燈忘
復明直至曉來猶妄想耳中如有管絃聲

代賣薪女贈諸妓

亂蓬爲髮布爲巾
曉踏寒山自負薪
一種錢塘江畔
女着紅騎馬是何人

奉和李大夫題新詩二首各六韻

因嚴亭

一作固嚴

箕穎人窮獨蓬壺路阻難
何如兼吏隱復得事躋攀
巖樹羅階下江雲貯棟間
似移天目石疑入武丘山
清景徒堪賞皇恩肯放閒
遙知興未足即被詔徵還

忘筌亭

翠巘公門對朱軒野逕連
只開新戶牖不改舊風烟
空室閒生白高情澹入玄
酒容同座勸詩借屬城傳
自笑滄江畔遙思絳帳前
庭臺隨事有爭敢比忘筌
予以長慶二年冬十月到杭州明年秋九月

始與范陽盧賈汝南周元範蘭陵蘭悅清
河崔求東萊劉方輿同遊恩德寺之泉洞
竹石籍甚久矣及茲目擊果愜心期因自
嗟云到郡周歲方來入寺半日復去俯視
朱綬仰睇白雲有愧於心遂留絕句

雲水埋藏恩德洞
簪裾束縛使君身
慙來不宿歸州
去應被山呼作俗人

早冬

十月江南天氣好
可憐冬景似春華
霜輕未殺萋萋
草日暖初乾漠漠
沙老柘葉黃如嫩
樹寒櫻枝白是
狂花此時却羨
閒人醉五馬無
田入酒家

歲假內命酒贈周判官蕭協律

共知欲老流年急且喜新正假日頻聞律此時相勸
醉偷閒何處共尋春脚隨周叟行猶疾頭比蕭翁白
未勻歲酒先拈辭不得被君推作少年人

與諸客携酒尋去年梅花有感

馬上同携今日盃湖邊共覓去年梅年年只是人空
老處處何曾花不開詩思又牽吟咏發酒酣閒喚管
絃來樽前百事皆依舊點檢惟無薛秀才

去年與薛景文同賞

今年長逝

醉送李協律赴湖南辟命因寄沈八中丞

富陽山底樟亭畔立馬停舟飛酒盃曾共中丞情繾綣
暫留協律語踟躕紫微星北承恩去青草湖南稱
意無不美君官美君幕幕中收得阮元瑜

內道場永謹上人就郡見訪善說維摩經臨
別請詩因以此贈

五夏登壇內殿師水為心地玉為儀正傳金粟如來
偈何用錢塘太守詩苦海出來應有路靈山別後可
無期他生莫忘今朝會虛白亭中法藥時

見李蘇州示男阿武詩自感成詠

遙羨青雲裡祥鸞正引鷄自憐滄海畔老蚌不生珠
正月十五日夜月

歲熟人心樂朝遊復夜遊春風來海上明月在江頭
燈火家家市笙歌處處樓無妨思帝里不合厭杭州
題州北路傍老柳樹

皮枯緣受風霜久條短為經攀折頻但見半衰當此

路不知初種是何人雪花零碎逐年減烟葉稀疎隨
分新莫道老株芳意少逢春猶勝不逢春

題清頭陀

頭陀獨宿寺西峯百尺禪菴半夜鐘烟月蒼蒼風瑟瑟
更無雜樹對山松

自歎二首

形羸自覺朝食減睡少偏知夜漏長實事漸消虛事
在銀魚金帶遶腰光

二

二毛曉落梳頭懶兩眼春昏點藥頻唯有閑行猶得
在心情未到不如人

湖上醉中代諸妓寄嚴郎中

笙歌杯酒正歡娛忽憶仙郎望帝都借問連宵直南
省何如盡日醉西湖蛾眉別久心知否鷄舌含多口
厭無還有些些惆悵事春來山路見蘼蕪

自詠

悶發每吟詩引興興來兼酌酒開顏欲逢暇日先招
客正對衙時亦望山勾檢簿書多鹵莽隄防官吏少
機關誰能頭白勞心力人道無才也是閒

晚興

草淺馬翩翩新晴薄暮天柳條春拂面衫袖醉垂鞭
立語花隄上行吟水寺前等閒消一日不覺過三年

早興

晨光出照屋梁明初打開門鼓一聲犬上階眠知地

濕鳥臨窓語報天晴半銷宿酒頭仍重新脫冬衣體乍輕睡覺心空思想盡近來鄉夢不多成

竹樓宿

小書樓下千竿竹深火爐前一盞燈此處與誰相伴宿燒丹道士坐禪僧

湖上招客送春汎舟

欲送殘春招酒伴客中誰最有風情兩瓶簪下新求得一曲霓裳初教成時崔湖州寄新簪下酒來樂妓案霓裳羽衣曲初畢排比

管絃行翠袖指麾船舫點紅旌慢牽好向湖心去恰似菱花鏡上行

戲醉客

莫言魯國書生懦莫把杭州刺史欺醉客請君開眼

望綠楊風下有紅旗

紫陽花

招賢寺有山花一樹無人知名色紫氣香芳麗可愛頗類仙物因以紫陽花名之

何年植向仙壇上早晚移栽到梵家雖在人間人不識與君名作紫陽花

白氏文集卷第二十

